

ADYAYA I

PURWAKA

1.1. Dadalan Pikobet

Pamalajahan pinih mautama pisan ri sajeroning kahuripan sane prasida nadosang jadma sane mautama lan madue *kualitas* sane pinih becik. Dadosne saking pamalajahan punika kautsahayang mangda prasida ngembangang kaweruhan para sisia mangda prasida dados jadma sane madue panglaksana sane becik, *beriman* lan *bertakwa* majeng ring linggih Ida Sang Hyang Widhi Wasa/*Tuhan Yang Maha Esa*. Pamalajahan mautama pisan lan mapaiketan sareng kahuripan, mawastu pamalajahan punika ngicenin makudang-kudang kaweruhan, *keterampilan*, lan paubahan parilaksana. Yening nenten wenten pamalajahan, mawastu jadma nenten prasida pacang ngalimbak kaweruhannyane, saantukan pamalajahan matetujon ngwangun bangsa sane manut saking tetujon *nasional* sane kaaptiang. Manut Dantes (2014:2) pamalajahan kalaksanayang ngwantu sisia mangda prasida ngembangan kaweruhan sane kadruwenang. Pamalajahan inggih punika usaha *sadar* sane kalaksanayang olih keluarga, krama, lan pemerintah sane kalaksanayang ring sekolah makemiwah nenten ring sekolah sane kamargiang salantang tuuh sane kaanggen nyayagayang para sisia mangda prasida ngelaksanayang swadarma ri sajeroning kahuripan kaanggen ring masa sane pacang rauh, Edgar Dalle (ring Neolaka, 2017).

Pemerintah sane ngalaksanayang sakancan sane wenten ring Negara, ngutsahayang ngawentenang pamalajahan majeng ring samian krama sane wenten ring Negara sane sampun kajantenang lan sampun mungguh ri sajeroning undang-undang. Undang-Undang No. 12 Warsa 2012 ngeninin indik *Pendidikan Tinggi* ring *pasal* 1 nyantenang “pamalajahan inggih punika usaha *sadar* lan madue rencana anggen *mewujudkan* parikrama pamalajahan mangda sisia *aktif* ngembangan kewagedannyane mangda madue kawagedan ri sajeronin agama, *pengendalian diri, kepribadian*, kaweruhan, *akhlak* sane becik, taler *keterampilan* sane kaperluan olih deweknyane, krama, bangsa, lan negara”.

Sane nenten dados lempas saking pamalajahan inggih punika pamalajahan basa. Saantukan basa kabaosang pinaka sesuluh utawi *cermin* ri sajeroning negara. Nika sane mawinang pamalajahan ngeninin indik basa banget mabuat pisan kauratiang lan kalaksanayang saantuka basa pinaka sarana sane kaanggen mababaosan ri sajeroning kahuripan, lan ri sajeroning pamalajahan, yening nenten wenten basa pamalajahan taler nenten prasida mamargi becik. Pamalajahan basa kabuatan pisan pamekas ring panegara Indonesia saantukan, manut Ethnologue (2014) Indonessia akeh madue kabudayan, suku bangsa, lan basa pinaka kaluiahane sane mautama. Wenten 741 basa daerah (basa ibu) ring Indonesia sane wenten ring sajebag panegara Indonesia saking *Sabang* ngantos ke *meraoke*. Silih sinunggil basa *daerah* sane wenten ring panegara Indonesia inggih punika basa Bali.

Basa Bali ri sajeroning pamalajahan mautama pisan kawentenannyane saantukan basa Bali inggih punika sarana sane kaanggen mababaosan ring kahuripan sarahina-rahina olih krama Bali (Noviantari, 2013). Nika sane

mawinang basa Bali puniki patut kaajegang olih krama Baline sami saantukan basa Bali punika pinaka tatamian para leluhur Bali sane patut satata kaajegang, asapunika taler basa Bali wantah jatiraga krama Baline sane sampun sapatutnyane krama Bali sane nganggen basa punika lan patut stata bangga lan setata ngajegang basa druwen irigana inggih punika basa Bali. Nika sane mawinang basa Bali patut kapelajahin ri sajeroning pamalajahan, pamekasnyane ring sekolah. Pamalajahan basa Bali sampun wenten saking *tingkat* SD, SMP, SMA utawi SMK nyantos ring *perguruan tinggi*. Pamalajahan basa Bali ring tingkat SD kanton melajahin basa Bali sane dasar, minakadi melajahain wasta-wasta angga sarira antuk basa Bali. Sesampune nincap ring kelas sane duuran ring SD, sampun ngawitin melajahan indik satua, aksara nanging kanton dasar. Raris rumasuk ring SMP peplajahannyane taler sampun pastika ngangsan-ngangsa nincap kawentenannyane, asapunika taler ring SMA utawi SMK miwah nyantos ring *perguruan tinggi*.

Nanging ring kawentenan aab jagate sekadi mangkin sane sampun kasungguh aor tanpa wates utawi *zaman Globalisasi* kawentenan basa Bali ring Bali asapunika taler ring kawentenan pamalajahan sampun nenten sekadi dumun kawentenannyane. Napi malih kawentenan panglimbak *teknologi* sane sampun sayan-sayan *canggih* punika taler sane ngawinang kawentenan basa Bali ring aab mangkin sampun nenten sekadi dumun, saantukan akehan krama Baline sampun keni iusan panglimbak jagat lan iusan basa saking dura negara. Punika taler maiyus risajeroning pamalajahan basa Bali, pikolih pamalajahan basa Bali ring aab mangkin doh melianan sareng pikolih pamalajahan basa Bali ring kawentenan jagate dumun. Parindikanne puniki prasida kacingakin saking pikolih pamalajahan

basa Bali ri sajeroning parikrama pamalajahan ring sekolah. Ring tingkat SD, SMP, miwah SMA utawi SMK, pikolih pamalajahan ri sajeroning mata palajahan basa Bali sampun ngangsan-ngangsan nenten becik pikolihnyane. nanging nenten samian sisia pikolih pamalajahan basa Balinyane nenten becik, nangih akehan taler sisia sane ngamolihan nilai sane doh ring sane kawastanin paripurna utawi KKM.

Saantukan kawentenan basa Bali pamekahnyane ri sajeroning pamalajahan lan pikolih pamalajahan sekadi asapunika kawentenannyane, pemerintah raris makarya usaha sane prasida kaanggen nepasin parindikan kawentenan basa Bali ring pamalahan puniki. Malarapan saking awig-awig Gubernur Bali Nomor 80 Warsa 2018 ngeninin indik ngelestarian basa, sastra lan aksara Bali, pemerintah madue tetujon lan pangapti sumangdane krama Bali utamane yowana Bali prasida ngangsan-ngansan eling ring jatiraganyane medados krama Bali inggih punika eling ring basa sastra, lan aksara Bali, sumangdane basa Bali prasida ajeg nyantos kapungkur wekas. Nanging risampune pemerintah ngawedarang awig-awige punika kanton manten pikolih pamalajahan basa Baline doh saking sane kabaosang paripurna, saantukan kanton keni iusan panglimbak jagate sekadi mangkin puniki. Sane taler banget dados uratian ri sajeroning kawentenan pamalajahan basa Bali inggih punika kawentenan pamalajahan aksara Bali taler sane sampun doh malianan sareng kawentenan sane dumun.

Pamalajahan aksara Bali ring kawentenan jagat sekadi mangkin puniki sampun nenten sekadi dumun kawentenannyane. Saantukan ring kawentenan jagat sekadi mangkin, napi malih sane kaiyusin olih panglimbak jagat, pamalajahan aksara Bali sampun kidik sane nyenengin. Parindikane puniki

prasida kacingak saking sampun ngansan kidiknyane krama Bali sane uning ring aksara Bali. Napi malih baosan ri sajeroning wewidangan sekolah saking SD nyantos SMA, sampun akidik pisan sisia sane kedaut manahnyane melajah aksara Bali. Napi malih ring wewidangan SD, alit-alite utawi para sisia, saking kelas 1 ngantos kelas 6 sampun kidik pisan kedaut manahnyane melajahin aksara Bali. Akeh pisan mangkin kacingakin alit-alite utawi para sisia ring SD pamekasnyane, sane sampun kelas 6 nanging ngeninin indik dasar aksara manten dereng uning, niki sane pinaka cihna sampun sayan-sayan kidik pisan manah saking para sisia ring SD pamekasnyane, melajahin aksara Bali. Panampen sane ngeninin indik kawentenan pemelajahan aksara Bali puniki boya ja tanpa dasar, wenten sujana taler sane maosan parindikane puniki, lan akeh wenten *kajian ilmiah*, gatra ring *interet*, sane taler maosang parindikane puniki. Manut Suwija (2015:4) malajahin basa Bali ketah karasayang meweh antuk para siswane duaning nganggen kalih huruf, inggih punika huruf Latin miwah aksara Bali. Sasuratan nganggen aksara Bali punika sane sering mawinan jekeh para siswane. Manut Sazwidka (2019:1) ring Bali pamalajahan basa lan aksara Bali rumasuk ri sajeroning *muatan local* lan sampun kapolihan pamalajahannyane saking SD ngantos ke SMA. Nanging pamalajahan aksara Bali meweh yening kapalajahin saantukan akeh madue model aksara lan wentennyane uger-uger sane ngiket ri sajeronng tata sasuratan aksara Bali. Parindikane punika sane ngawinang sisia nenten seneng yening melajahin aksara Bali saantukan rumasa yening malajah aksara Bali punika meweh pisan. Asapunika taler manut Kompasiana, maosang sane ngawinang yowanane nenten kayun malajahin aksara Bali inggih punika sangkaning panglimbak jagate sane akehan makta panglalah budaya dura negara sane sampun *modern* mawastu

punika sane ngawinang rerednyane *kearifan local*, lianan ring panglimbak jagat inggih punika kirangnyane krama Bali sane waged ri sajeroning aksara Bali saantukan sampun kidik sane nyenengin lan yening wenten sane waged aksara Bali pastika sampun lingsir lan sampun nenten mrasidayang malih ngajahin aksara Bali, lianan ring punika taler aksara Bali inggih punika aksara sane meweh yening kapalajahin lan iraga merluang galah sane akeh yening malajahin aksara Bali punika. Nika makudang-kudang *kajian ilmiah* lan orti ring media sosial sane maosan yening kawentenan aksara Bali pamekasnyane kawentenan pemelajahan aksara Bali. Kawentenan kidiknyane kayun sisia melajahin aksara Bali pamekasnyane ring SD, niki taler cingak titiang ring SD Negeri 1 Riang Gede. Kawentenan sisia ring SD Negeri 1 Riang Gede sampun akidik pisan sane uning ring aksara Bali. Parindkane puniki taler kasobyahan olih guru pangampu pamalajahan basa Bali, sane maosang yening sisia ring SD Negeri 1 Riang Gede sampun akidik sane seneng melajahin aksara Bali. Yening sampun polih pamalajahan ngeninin indik aksara Bali sampun pastika sisiane wenten sane kiap, tur guru ritakala ngajahin punika nenten kauratian olih para sisia, napi malih wentennyane *game online*, sisia akehan senengan meplalianan *game online* katimbang kanikain melajah aksara Bali. Asapunika kabaosang olih guru pangampu pamalajahan basa Bali ring SD Negeri 1 Riang Gede.

Kawentenan pamalajahn aksara Bali sekadi asapunika ring SD Negeri 1 Riang Gede saantukan parikrama pamalajahan aksara Bali ring sekolah sane kantun nganggen tata cara pamalajahan sane kantun *konfensional*, mawastu parikrama pamalajahan punika karasayang kirang nudut kayun para sisia ring kelas. Napi malih ri kanjekan pakibeh jagat sekadi mangkin sane ngawinang

pamalajahan aksara Bali punika karasayang meweh yening kapalajahin olih para sisia, raris kasarengin antuk tata cara pamalajahan sane kirang nudut kayun, mawastu sampun para sisia ngansang ngerasayang meweh tur ngansan merasa takut yening melajahin aksara Bali. Sapatutnyane guru utamannyane guru basa Bali punika ngawigunayang kawentenan jagat sane ngansan canggih puniki sumangdane parikrama pamalajahan prasida mamargi nginutin zaman tur nginutin kawentenan teknologi sane ngansan-ngansan canggih, napi malih wentennyane ring panglimbak jagat mangkin puniki, minakadi wentennyane *HP* sane ngansan canggih, wentennyane *game online*, sepatutnyane guru prasida ngembangan tur ngawigunayang panglimbak jagate puniki kaanggen sarana ngelimbakang taler kawentenan pamalajahan aksara Bali sumangdane prasida nudut kayun sisia melajahin aksara Bali. Malarapan saking parindikane punika panilik meled taler ngambil tatalikan ngeninin indik sapunapi antuk sumangdane pamalajahan aksara Bali punika prasida nudut manah sisia malajah aksara Bali. Panilik meled nganggen metode sane *berbasis game interaktif* ri sajeroning ngelaksanayang parikrama pamalajahan aksara Bali. Tetujon panilik meled nganggen metode pamalajahan sane *berbasis game* puniki, saantukan ring kawentenan para sisiane mangkin sampun akehan waged-waged ritatkala meplalian *game online* lan sisia akehan mangkin sampun pastika senengan maplalian *game online* katimbang kanikain malajah aksara Bali. Malarapan saking parindikane punika panilik mapikayunang sapunapi antuk sumangdane pamalajahan aksara Bali punika katerapang marupa *game interaktif* maaksara Bali sane nudut manah mangda sisia punika nenten waneh yening melajah aksara Bali lan mangda sisia prasida seneng malajah aksara Bali. Napi malih ritatkala panilik ngalaksanayang *observasi* ring

SD Negeri 1 Riang Gede, guru pangampu pamalajahan bahasa Bali irika taler maosang meweh pisan mangda sisia punika *tertarik* sareng pamalajahan bahasa Bali utamannyane malajahin aksara Bali saantukan akehan sisiane senengan meplalian HP tur maplalian *game online* kemanten katimbang malajah bahasa Bali utamannyane aksara Bali. Melarapan sangkaning parindikane punika penilik sane pinaka calon guru pengampu pamalajahan basa Bali medue manah sapunapi sumangdane prasida nganggen panglimbak jagat sekadi mangkin puniki, utamannyane wentennyane *game interaktif*, mangda prasida kaanggen ritatkala ngelaksanayang pamalajahan aksara Bali ring sekolah, sumangdane para sisia utamannyane ring SD Negeri 1 Riang Gede mangda kedaud manah ipun melajahin aksara Bali. Panilik raris ngerereh mekudang-kudang piranti utawi *media* sane prasida kaanggen ngwantu ritatkala pamalajahan aksara Bali nanging sane merupa *game interaktif* sumangdana para sisia kedaud manahnyane melajahin aksara Bali. Sesampune panilik ngerereh piranti utawi *media* merupa *game interaktif* sane prasida kaanggen ngwantu ritatkala ngelaksanayang pamalajahan aksara Bali, panilik raris ngemolihan *media game interaktif* maaksara Bali sane kerasayang becik ritatkala kaanggen ngajahin aksara Bali pamekasnyane ring SD Negeri 1 RIanggede, inggih punika *media interaktif wordwall* sane prasida kaanggen ngajahin aksara Bali.

Sampun wenten makudang-kudang panilik sane nganggen tata cara pamalajahan aksara Bali nginutin pakibeh jagat lan nginutin kawentenan teknologi sane ngangsan-ngansan canggih puniki sane matetujon sumangdane parikrama pamalajahan aksara Bali mangda prasida ngangsan nudut kayun sisiane, lan sumangdane sisia nenten malih merasa jekeh yening melajahin aksara Bali.

Wentennyane makudang-kudang panilik sane nganggen model pamalajahan sane ngingutin panglimbak jagat lan teknologi inggih punika sekadi, sane kapertama punika wenten Dwi (2019) sane tatilikannyane mamurda Nureksain Kaanutan Sesuratan Aksara Bali Nganggen *Noto Font* Lan Aplikasi Papan Ketik *Multiling O Keyboard*. Sane kaping kalih wenten Suari (2017) sane tatilikannyane mamurda Metode *Drill* Anggen Nincapang Kawagedan Nyalin Teks Aksara Latin Ke Aksara Bali Sisia Kelas VIII A SMP N 2 Kubu Karangasem. Lianan ring punika taler wenten Sinta (2019) sane tatilikannyane mamurda Nincapang Kawagedan Ngwacen Aksara Bali Sisia Kelas IVA SD Negeri 2 Sakti Nusa Penida Warsa 2018/2019 Antuk Media Topi Aksara Sane Kasurat Nganggen *Aplikasi Balinese Font And Keyboard*. Samian tatilikane punika matetujon sumangdane pamalajahan aksara Bali prasida nudut manah sisia malajah aksara Bali asapunika taler sumangdane aksara Bali prasida kasenengin malih olih para sisia. Nanging ri sajeroning usaha sane sampun kautsahayang anggen nincapang kayun sisia melajahin aksara Bali, dereng wenten sane nganggen wantuan *media interaktif* merupa *game*.

Antuk punika panilik meled ngalaksanayang tatilikan sane mamurda Nincapang Kaweruhan Sajeroning *Pemetaan* Aksara Bali ka *Huruf* Latin Maduluran Antuk *Media Interaktif Wordwall* Sisia Kelas IV SD Negeri 1 Riang Gede Warsa 2020/2021, sane mapangapti sumangdane saking pidabdab tatilikan puniki sisia ngasan kedaut manah ipun malajahan aksara Bali, lan sumangdane sangkanin tatilikan sane kalaksanayang olih panilik puniki, prasida kadadosang dasar olih guru pangampu pamalajahan basa Bali, mangda prasida taler ritatkala ngajahin basa Bali, sisia kadaut manah ipun melajah basa Bali.

1.2. Ngrereh Pikobet

Ri sajeroning tetilikan puniki, panilik ngrereh makudang-kudang pikobet sane mapaiketan sareng dadalan pikobet sane sampun katlataran ring ajeng. Pikobet-pikobet punika sampun pastika mapaiketan sareng kawagedan *pemetaan* aksara Bali. Pikobet sane sampun karereh minakadi, (1) Sapunapi tata cara nganggen *media* sane *interaktif* anggen nincapang kawagedan aksara Bali ri sajeroning pamalajahan, (2) Sapunapi kawagedan sisia wusan melajah aksara Bali nganggen *media interaktif*, (3) Sapunapi panampen sisia ngeninin indik kawentenan *media interaktif* sane kaanggen ri sajeroinin pamalajahan aksara Bali, miwah (4) Sapunapi *implikasi* sane kapolihan olih sisia yening malajahin aksara Bali nganggen *media interaktif*.

1.3. Ngwatesin Pikobet Tetilikan

Ri sajeroning tetilikan puniki, panilik jagi nureksain lan ngwatesin malih pikobet sane sampun karereh tur kapolihang. Pikobet punika kawatesin mangda panilik prasida paripurna ritatkala nepasin sakancan pikobet tetilikan sane wenten, saantukan tetilikan puniki kabanda antuk galah. Yening maosang ngeninin indik pikobet ri sajeroning aksara Bali pastika akeh pikobet-pikobet sane wenten ri sajeroning ksara Bali. Nanging panilik pacang nilikin pikobet-pikobet sane wenten ri sajeroning pemelajahan aksara Bali utamannyane pemelajahan aksara Bali sane wenten ring SD.

1.4. Bantang Pikobet Tetilikan

Malarapan saking dadalan pikobet sane sampun katlataran ring ajeng bantang pikobet tetilikan puniki inggih punika:

1. Sapunapi tata cara nganggen *media interaktif wordwall* anggen nincapang kawagedan *pemetaan* aksara Bali sisia kelas IV SD Negeri 1 Riang Gede Warsa 2020/2021 ?
2. Sapunapi kawagedan sisia kelas IV SD Negeri 1 Riang Gede wusan nganggen *media interaktif wordwall* ri sajeroning pamalajahan *pemetaan* aksara Bali ?
3. Sapunapi panampen sisia kelas IV SD Negeri 1 Riang Gede ngeninin indik kawentenan *media interaktif wordwall* ri sajeroinin pamalajahan *pemetaan* aksara Bali ?

1.5. Tetujon Tetilikan

Malarapan saking bantang pikobet ring ajeng, tetujon tetilikan puniki inggih punika:

1. Sumangdane uning lan prasida nelatarang tata cara nganggen *media interaktif wordwall* ri sajeroning nincapan kawagedan *pemetaan* aksara Bali sisia kelas IV SD Negeri 1 Riang Gede warsa 2020/2021
2. Sumangdane uning lan prasida nelatarang sapunapi kawagedan sisia kelas IV SD Negeri 1 Riang Gede wusan nganggen *media interaktif wordwall* ri sajeroning pamalajahan *pemetaan* aksara Bali.
3. Sumangdane uning lan prasida nelatarang panampen sisia kelas IV SD Negeri 1 Riang Gede indik kawentenan *media interaktif wrdwall* ri sajeroning pamalajahan *pemetaan* aksara Bali.

1.6. Kawigunan Tetilikan

Kawigunan tetilikan sane mamurda Nincapang Kaweruhan Sajeroning Pemetaan Aksara Bali ka *Huruf* Latin Maduluran Antuk Media Interaktif Wordwall Sisia Kelas IV SD Negeri 1 Riang Gede Warsa 2020/2021 madue kalih kawigunan, inggih punika 1). kawigunan pamucuk, 2). kawigunan panglimbak, sekadi sane katelataran ring sor.

1. Kawigunan Pamucuk

Tetilikan puniki kaaptiang mangda prasida ngicenin pangweruhan ngeninin indik malajah lan ngajahin pamalajahan aksara Bali nganggen tata cara pamalajahan sane nudut kayun sisia inggih punika nganggen *Media Interaktif*. Malarapan saking nganggen *model* pamalajahan sane nudut kayun, sisia ngangsan kedaut manahnyane melajahin aksara Bali. Mawastu kawentenan aksara Bali ngangsan ngelimbak lan para sisia ngangsan wagen ri sajeroning pamalajahan aksara Bali.

2. Kawigunan Panglimbak

a. Majeng ring Sisia

Tetilikan puniki kaaptiang prasida nuntunin sisia natasang pikobet ngenenin indik palajahan *pemetaan* aksara Bali, sakadi meweh ngapalang wangun aksara Bali, meweh ngresepang indik pasang aksara Bali, rumasa waneh ritatkala malajah aksara Bali. Malarapan antuk ngawigunayang *Media Interaktif Wordwall*, kaaptiang prasida ngawetuang pikolih sane becik inggih punika sisia waged miwah seneng malajah *pemetaan* aksara Bali.

b. Majeng ring Guru Basa Bali

Tetilikan puniki kaaptiang prasida nuntun guru pengampu pamalajahan basa Bali mangda prasida nincapang pengweruhan ritatkala ngawentenang parikrama pamalajahan *pemetaan* aksara Bali ring sekolah sumangdane nganggen *media interaktif wordwall*. Malarapang saking nganggen parikrama pamalajahan punika ngwantu guru ritatkala ngajahin dangan ritatkala nelatarang materi, saantukan sampun kawantu saking nganggen *media interaktif wordwall* puniki.

c. Majeng ring Panilik Lianan

Tetilikan puniki kaaptiang prasida kaanggen pratiwimba lan tetimbangan olih panilik sane lianan sane madue arsa jagi makarya tetilikan indik nincapang kawagedan *pemetaan* aksara Bali. Asapunika taler melarapan saking tetilikan puniki panilik sane meled ngambil tetilikan ngeninin indik nincapang kawagedan *pemetaam* aksara Bali prasida dangan mekarya tetilikan, duaning tetilikan puniki prasida kaanggen geguat ritatkala makarya tetilikan.

